



UNIVERSITÄTS-
BIBLIOTHEK
PADERBORN

Universitätsbibliothek Paderborn

Conciliarvm Omnium Generalium Et Provincialium Collectio Regia

Ab anno CCCXXXII. ad annum CCCCLI.

Parisiis, 1644

Epistola XX. Leonis Papae I. Ad Flavianvm Episcopvm. Catholicum incarnationis dogma contra Eutychem defendendum: ipsi, si resipuerit, indulgendum monet.

urn:nbn:de:hbz:466:1-14584

tem Domini reperendum putat, qui eius imperitiæ a-
 mentiaque consentiat, diu apud nos incertum fuit, quid
 in ipso catholicis displiceret. Et cum fratris nostri Flauia-
 ni nullas literas sumeremus, ipse autem scriptis suis Ne-
 storianam hæresim repullulare quereretur; non plene
 potuimus discere, vnde procederet, vel quo tenderet
 tam dolosa causatio. Sed postquam gestorum ad nos epi-
 scopalium documenta perlata sunt, omnia illa, quæ fal-
 lacium querelarum velamine tegebantur, quam essent
 detestanda, patuerunt. Et quia clementissimus impera-
 tor, pro beneuolentia ac pietate animi sui, de statu huius,
 qui ante honorabilis videbatur, diligentius voluit iudi-
 cari, atque ob hoc indicendum credidit episcopale Con-
 cilium, per fratres nostros Iulianum episcopum, & Re-
 natum presbyterum, sed & filium meum diaconem Hi-
 larium, & quos ex latere meo vice mea misi, ad fratrem
 nostrum Flavianum sufficientia pro qualitate causæ scri-
 pta direxi, quibus & vestra dilectio, & ecclesia vniuersa
 cognoscat, de antiqua & singulari fide, quam indoctus
 impugnator incessit, quid diuinitus traditum teneamus,
 & quid incommutabiliter prædicemus. Quia tamen non
 debemus partes miserationis omittere, congrua modera-
 tione credidimus sancendum, vt si condemnatus presby-
 ter plena satisfactione corrigitur, sententiâ, qua obstrictus
 est, relaxetur. Si vero in eodem insipientiæ suæ luto iacere
 delegerit, statuta permaneant, & cum eis habeat sortem,
 quorum est secutus errorem. Data Idibus Iunii, Asterio
 & Protogene viris clarissimis consulibus.

EPISTOLA XX.

LEONIS PAPÆ I.

AD FLAVIANVM EPISCOPVM.

Catholicum incarnationis dogma contra Eutychen de-
 fendendum: ipsi, si resipuerit, indulgendum monet.

Flauiano dilectissimo fratri, Leo episcopus.

PROFECTIS iam nostris, quos ad vos in fidei causâ
 direximus, per filium nostrum Basilium diaconem
 scripta tuæ dilectionis accepimus, quibus merito pa-

*indidi-
sti, rum de negotio communis sollicitudinis * indidiffes, quoniam & gesta ante delata, de omnibus nos sufficienter instruxerant, & ad familiarem interrogationem idoneus erat sermo prædicti, per quem nunc alloquia reddentes, dilectionem tuam per Dei gratiam, in qua fidimus, cohortamur, vtentes verbis apostolicis, atque dicentes: *In nullo terreamini ab aduersariis, quæ est illis causa* Philip. 1. *perditionis, vobis autem salutis.* Quid enim tam exitiabile, quam negata veritate incarnationis Christi, omnem spem salutis humanæ velle dissoluere? & Apostolo contraire dicenti manifeste: *Magnum est pietatis sacramentum,* 1. Tim. 3. *quod manifestatum est in carne?* Quid tam gloriosum, quam contra inimicos natiuitatis & crucis Christi pro fide euangelica dimicare? De cuius purissimo lumine, inuictaque virtute, datis iam ad tuam dilectionem literis, quid in nostro esset corde patefecimus: ne de illis, quæ secundum doctrinam catholicam didicimus & docemus, aliquid inter nos videri possit ambiguum. Quia vero tam valida, & tam clara sunt testimonia veritatis, vt nimis cæcus nimisque obduratus habendus sit, qui ad coruscationem lucis atque rationis non confestim se a tenebris falsitatis excusserit: ad curandam imperitorum insaniam, etiam patientiæ volumus adhibere medicinam, vt paternas increpationes hi, qui in senectute carnis suæ mente sunt paruuli, discant obedire maioribus. Ac si deposita imperitiæ suæ vanitate resipiscunt, omnique errore damnato fidem veram singularemque suscipiunt, misericordia eisdem episcopalis beneuolentiæ non negetur, mansuro iudicio, quod præcessit, si impietas merito condemnata, in sua prauitate persistit. Data decimo Kalendas Augusti, Asterio & Protogene viris clarissimis consulibus.